



Untung suku pertama MSM merosot ketara kepada RM8 juta

Oleh Mohd Zaky Zainuddin - Mei 22, 2025 @ 3:57pm



MSM Malaysia Holdings Bhd - NSTP/SAIFULLIZAN TAMADI

KUALA LUMPUR: Keuntungan sebelum cukai (PBT) MSM Malaysia Holdings Bhd (MSM) susut ketara kepada RM8 juta pada suku pertama tahun kewangan berakhir 31 Disember 2025, 88 peratus lebih rendah berbanding RM66 juta yang dicatatkan pada suku sama tahun lalu.

Prestasi kewangan lebih rendah pengeluar jenama gula bertapis utama, 'Gula Prai' itu disebabkan harga jualan purata (ASP) dan jumlah jualan yang lebih rendah, membayangi keuntungan daripada kos pengeluaran yang lebih rendah.

Faktor ASP dan jualan rendah turut mengheret turut pendapatan MSM bagi suku dikaji kepada RM750 juta, 17 peratus lebih rendah berbanding RM907 juta yang diraih pada suku pertama tahun kewangan 2024.

Dari segi operasi, MSM mencatatkan pengurangan kos pengeluaran sebanyak 10 peratus berbanding suku pertama tahun kewangan 2024, dipacu kadar NY11 dan pertukaran asing yang lebih rendah.

MSM turut melaporkan faktor penggunaan kapasiti (UF) yang lebih rendah sebanyak 47 peratus dalam S1TK2025, berbanding 52 peratus pada tempoh yang sama tahun lalu disebabkan oleh penutupan loji di kedua-dua kilang penapisan, namun diimbangi oleh hasil kecekapan yang konsisten.

Ketua Pegawai Eksekutif Kumpulan MSM, Syed Feizal Syed Mohammad, berkata industri gula dijangka terus berdepan cabaran tahun ini disebabkan kos input yang kekal tinggi dan ketidaktentuan harga gula mentah di tengah-tengah pengeluaran global yang berubah-ubah.

"Amalan lambakan gula import ke dalam negara tanpa kawalan turut memberi kesan terhadap jumlah dan harga jualan.

"Namun, perkara ini telah dibangkitkan oleh industri gula tempatan bersama pihak berkuasa untuk tindakan anti-lambakan yang diperlukan. Industri gula tempatan menjangkakan isu ini dapat diselesaikan demi memastikan kestabilan harga dan kelestarian sekuriti makanan negara.

"Sementara itu, di peringkat global, kami terus berwaspada terhadap ketegangan geopolitik yang semakin memuncak dan perang perdagangan yang berterusan, yang mana kedua-duanya menimbulkan risiko kepada rantai bekalan global, aliran perdagangan serta kestabilan mata wang," katanya dalam satu kenyataan.

Syed Feizal berkata, dari segi operasi, MSM akan terus memaksimumkan penggunaan asetnya termasuk mengekalkan prestasi tinggi dengan UF melebihi 80 peratus bagi MSM Prai.

"Dengan operasi MSM Johor yang telah stabil, kami akan menumpukan kepada peningkatan UF kepada 45 peratus, dengan sasaran hasil 94 peratus dan penambahbaikan berterusan dalam penggunaan tenaga.

"Penyempurnaan Boiler 3 di Johor menjelang akhir 2025 akan meningkatkan lagi kapasiti pengeluaran dan kecekapan operasi," katanya.

Beliau berkata, MSM akan terus memaksimumkan pasaran domestik dan mengoptimumkan kehadiran di pasaran eksport, disokong oleh permintaan yang stabil dan peluang yang semakin berkembang dalam segmen produk nilai tambah.

"Kami berhasrat untuk mengembangkan kehadiran pasaran terutamanya di China dan rantau ASEAN, termasuk Vietnam, Indonesia, Singapura dan Filipina.

"Matlamat kami adalah untuk meningkatkan jumlah eksport keseluruhan kepada 360,000 tan pada tahun ini, dengan penekanan kepada produk nilai tambah seperti gula cecair dan pra-campuran dari MSM Johor.

"Kepelbagaian ini akan mengukuhkan jejak eksport kami dan membantu mengurangkan ketidakstabilan pasaran domestik," katanya.

Syed Feizal berkata, MSM akan terus bekerjasama secara aktif dengan kerajaan untuk memuktamadkan mekanisme harga yang mampan bagi pasaran runcit domestik dan mencadangkan langkah berkesan untuk mengawal gula bertapis import.

"Ini adalah inisiatif utama bagi melindungi keterjaminan makanan negara dan memastikan kelangsungan industri gula dalam jangka panjang," tambahnya.

HEADLINE	Untung suku pertama MSM merosot ketara kepada RM8 juta
MEDIA	Berita Harian
DATE	22 May 2025, 3:57pm
BY	Mohd Zaky Zainuddin
LINK	https://www.bharian.com.my/bisnes/korporat/2025/05/1399060/untung-suku-pertama-msm-merosot-ketara-kepada-rm8-juta?source=widget